

四庫全書

集部

# 欽定四庫全書

集部

李太白集分類補註卷二十四

二五

詳校官侍郎

臣謝墉

檢討臣何思鈞覆勘

總校官編修

臣

王燕緒

校對官學正

臣

翁樹棠

謄錄監生

臣

毛登峰

欽定四庫全書

李太白集分類補註卷二十二

宋

楊齊賢集註

元

蕭士贇補註

行役

安州應城王女湯作

荊州記云有玉女乘車投此泉

神女歿幽境湯池流大川陰陽結炎炭造化開靈泉地  
底燦朱火沙傍歆

氣盛貌

素煙沸珠躍明月皎鏡涵空天

氣浮蘭芳滿色漲桃花然精覽萬殊入潜行七澤連齊賢

曰唐安州應城縣西南八十里愈疾功莫尚變盈道乃有玉女池子虛賦楚有七澤

全濯濯氣清泚晞髮弄潺湲散下楚王國分澆宋玉田

可以奉巡幸奈何隔窮偏獨隨朝宗水赴海輸微涓齊賢

曰楚都郢今江陵府驪山有溫泉明皇幸焉則玉女湯亦可奉巡幸也惜乎出於窮僻之地徒與江漢朝宗于海耳士贇曰此雖紀詠詩然寄興則謂士不幸居僻遠之鄉雖抱王佐之才而無由自達身在江海心存魏闕而已

悲夫

之廣陵宿常二南郭幽居

綠水接柴門有如桃花源忘憂或假草滿院羅叢萱暝  
色湖上來微雨飛南軒故人宿茅宇夕鳥棲楊園還惜  
詩酒別深為江海言明朝廣陵道獨憶此傾樽

齊賢曰  
萱草忘

憂綠水桃花  
源見二卷

### 夜下征虜亭

船下廣陵去月明征虜亭山花如綉頰紅火似流螢

齊賢

曰丹陽記曰太安中征虜將軍謝安立此亭因為名

### 下途歸石門舊居

吳山高越水清握手無言傷別情將欲辭君挂帆去離  
魂不散烟郊樹此心鬱悵誰能論有愧叨承國士恩雲  
物共傾三月酒歲時同餞五侯門

齊賢曰吳王夫差都姑蘇越王句踐都會

稽五侯漢時王譚商音根逢時也

羨君素書常滿案含丹照白霞色爛

余嘗學道窮冥筌夢中往往遊仙山何當脫屣謝時去

壺中別有日月天俛仰人間易凋朽鍾峯五雲在軒牖

惜別愁窺玉女窓歸來笑把洪崖手

齊賢曰壺中日月事見前卷鍾峯鍾

也山隱居寺隱居山陶公鍊液棲其間靈神閉氣昔登攀

恬然但覺心緒閒數人不知幾甲子昨夜猶帶冰霜顏

我離雖則歲物改如今了然識所在別君莫道不盡歡

懸知樂客遙相待

齊賢曰南史陶弘景字通明丹陽秣陵人十歲得葛洪神仙傳晝夜研尋

便有養生之志齊高帝作相引為諸生侍讀上表辭祿止于茅山中立節自號華陽隱居梁武帝早與遊即位後書問不絕後合飛丹色如霜雪服之體輕及帝服飛丹有驗益重之人謂為山中宰相卒年八十五顏色不變屈伸如常香氣累日氤

氤滿山詔謚貞白先生

石門流水徧桃花我亦曾到

秦人家不知何處得雞豕就中仍見繁桑麻翛然遠與世事閒裝鸞駕鶴又復遠何必長從七貴遊勞生徒聚

萬金產挹君去長相思雲遊雨散從此辭欲知悵別心

易苦向暮春風楊柳絲

齊賢曰石門及桃源事見前七貴謂呂霍上官趙丁傅王也士

賈曰史陶朱公治產致千金子孫脩其業而息之遂至巨萬

### 客中行

蘭陵美酒鬱金香玉碗盛來琥珀光但使主人能醉客

不知何處是他鄉

齊賢曰唐沂州承縣本蘭陵武德四年以縣置鄆州更名承別置蘭陵鄆

城二縣正觀元年州廢省蘭陵鄆城以承屬沂州本草鬱金苗似姜黃花白質紅未秋出莖心無實根黃赤嶺

南亦有實似小荳蔻後漢哀牢國出琥珀註云松脂入地千年為茯苓茯苓千年為琥珀



# 太原早秋

歲落衆芳歇時當大火流霜威出塞早雲色渡河秋夢

遶邊城月心飛故國樓思歸若汾水無日不悠悠

齊賢曰說

文鶚鵯閔西曰巧婦閔東曰鶚鵯春分鳴則衆芳生秋分鳴則衆芳歇毛詩云七月流火唐晉州有臨汾汾西二縣太原府治晉陽士贇曰後漢律歷志自亢八度至尾九度曰太火之次

## 奔亡道中五首

蘇武天上田橫海島邊萬重關塞斷何日是歸年

齊賢

曰蘇武使匈奴不降匈奴徙武北海無人處唐西州交河郡天山縣有天山漢書田橫與其徒五百人入海

居島中

其二

亭伯去安在李陵降未歸愁容變海色短服改胡衣

齊賢

曰後漢書崔駰字亭伯為竇憲主簿前後奏記數十指切長短憲不能容出為樂浪郡長而崔駰以遠去不之官而歸前漢書天漢二年貳師將軍李廣利將三萬騎擊匈奴於天山使李陵將其射士步兵五千出居延北欲以分匈奴兵毋令專走貳師陵既至而單于以兵八萬圍擊陵軍陵且引且戰八日未到居延百餘里匈奴遮狹絕道陵食乏而救兵不到遂降匈奴

其三

談笑三軍却交游七貴疎仍留一隻箭未射魯連書士贊

曰談笑却秦軍及魯仲連為書射聊城中遺燕將事並見前

### 其四

函谷如玉關幾時可生還洛陽為易水嵩嶽是燕山俗

變羌胡語人多沙塞顏申包惟慟哭七日鬢毛斑士贊曰班

超願生入玉門關易水燕山及申包胥走秦庭晝夜哭七日七夜求兵救楚事見前

### 其五

淼淼望湖水青青蘆葉齊歸心落何處日沒大江西歇

馬傍春草欲行遠道迷誰忍子規鳥連聲向我啼

齊賢曰子

前規見

郢門秋懷

郢門一為客巴月三成弦朔風正搖落行子愁歸旋  
杳杳山外日茫茫江上天人迷洞庭水鴈度瀟湘  
烟清曠諧宿好緇磷及此年百齡何蕩漾萬化相推遷  
空謁蒼梧帝徒尋溟海仙已聞蓬海淺豈見三桃園  
倚劍增浩歎捫襟還自憐終當遊五湖濯足滄浪泉

齊賢曰前漢南郡江陵縣

故楚郢都楚文王自丹陽徙北後九世平王城之後十  
世秦拔楚郢徙東郢月至八日上弦至二十三日下午弦  
神仙傳麻姑謂王遠曰向到蓬萊水又淺於往日漢武  
內傳王母降漢宮侍女以玉盤乘仙桃七顆大如鴨子  
形圓青色王母以四顆與帝三顆自食帝  
將其核欲種之母曰此桃三千年一生實

至鴨欄驛上白馬磯贈裴侍郎

側疊萬古石橫為白馬磯亂流若電轉舉棹揚珠輝臨

驛卷緹幕升堂接綉衣情親不避馬為我解霜威

齊賢曰玉

篇緹  
黃色

荆門浮舟望蜀江

春水月峽來浮舟望安極正是桃花流依然錦江色江  
色綠且明茫茫與天平逶迤巴山盡搖曳楚雲行雪照  
聚沙鴈花飛出谷鶯芳洲却已轉碧樹森森迎流目浦

烟夕揚帆海月生江陵識遙火應到渚宮城

齊賢曰明月峽隸渝

州成都府有錦江織錦濯其中則鮮明唐峽州夷陵縣有巴山通典江陵縣有楚渚宮士贇曰師古曰月令仲春之月始雨水桃花始華蓋桃方華時既有雨水洲谷冰泮衆流猥集波瀾盛長故謂之桃花華水而韓詩傳云三

月桃花水

三峽

巫山夾青天巴水流若茲巴水忽可盡青天無到時三

朝上黃牛三暮行太遲三朝又三暮不覺鬢成絲

齊賢曰巫

山縣圖經巫山綿亘七百里非午夜不見日月江行彷彿九峯三峯在後不見巴江黃牛峽在峽州高厓間有

石如牽牛人黑牛黃

自巴東舟行經瞿塘峽登巫山最高峯晚還題壁

江行幾千里海月十五圓始經瞿塘峽遂步巫山巔巫

山高不窮巴國盡所歷日邊攀垂蘿霞外倚穹石飛步

凌絕頂極目無纖烟却顧失丹壑仰觀臨青天

齊賢曰自渝州

明月峽至夔州西陵峽四千里鬼門關隔山即瞿塘峽  
上有瞿塘關下瞰滙瀨堆其東小路數百步絕處即白  
帝祠旁有三峽堂臨瞿塘峽口自此半

日至夔州士贇曰張揖曰穹石大石也

青天若可捫銀

漢去安在望雲知蒼梧記水辨瀛海周遊孤光晚歷覽

幽意多積雪照空谷悲風鳴森柯歸途行欲曛佳趣尚

未歇江寒早啼猿松暝已吐月月色何悠悠清猿響啾

啾辭山不忍聽揮策還孤舟

齊賢曰歸藏啓筮  
有白雲出自蒼梧

早發白帝城

一作白帝  
下江陵

朝辭白帝彩雲間千里江陵一日還兩岸猿聲啼不盡



輕舟已過萬重山

一作須臾過却萬重山齊賢曰白帝城公孫述所築後為劉備屯戍之地

改名永安夔州陸路至江陵府九百四十五里

### 秋下荆門

霜落荆門江樹空布帆無恙挂秋風此行不為鱸魚膾

自愛名山入剡中

齊賢曰唐荆門縣隸江陵府荊州記郡西沂江六十里南岸有山名荊門

北岸有山名虎牙二山相對楚之西塞顧愷之為殷仲堪參軍在荊門因假還仲堪特以布帆借之至破家遭風大敗與仲堪箋曰地名破家真破家而出行人安穩布帆無恙晉張翰思鱸魚事見前剡縣隸會稽多名山水

江行寄遠

剡木出吳楚危槎百餘尺疾風吹片帆日暮千里隔別

時酒猶在已為異鄉客思君不可得愁見江水碧

齊賢曰易

繫辭剡木為舟說文槎邪斫木士贇曰史記張騫乘槎乃剡全木為之至今沅湘中有此名為舸舩船

宿五松山下荀媪家

我宿五松下寂寥無所歡田家秋作苦鄰女夜春寒跪

進彫胡飯月光明素盤令人慙漂母三謝不能餐

齊賢曰楊

憚書曰田家作苦子虛賦注彫胡菰菜也

下涇縣陵陽溪至澁灘

澁灘鳴嘈嘈兩山足猿猱白波若卷雪側足不容舠魚

子與舟人撐折萬張篙

齊賢曰小船曰舠

下陵陽沿高溪三門六刺灘

三門橫峻灘六刺走波瀾石驚虎伏起水狀龍縈盤何

慙七里瀨使我欲垂竿

齊賢曰甘州記桐廬有七里瀨瀨下數里至嚴陵瀨

夜泊黃山聞殷十四吳吟

昨夜誰為吳會吟風生萬壑振空林龍驚不敢水中卧

猿笑時聞巖下音我宿黃山碧溪月聽之却罷松間琴  
朝來果是滄洲逸酤酒醒盤飯霜栗半酣更發江海聲  
客愁頓向杯中失

宿鰕湖

雞鳴發黃山暝投鰕湖宿白雨映寒山森森似銀竹提  
攜採鉦客結荷水邊沐半夜四天開星河爛人目明晨  
大樓去岡隴多屈伏當與提斧翁前溪伐雲木

齊賢曰  
說文鉦

黑錫大樓  
隸宣城

懷古

西施

西施越溪女出自苧蘿山秀色掩今古荷花羞玉顏浣  
紗弄碧水自與清波閒皓齒信難開沉吟碧雲間句踐  
徵絕豔揚蛾入吳關提攜館娃宮杳渺詎可攀一破夫

差國千秋竟不還

齊賢曰句踐以西施獻吳王事見前卷士贇曰苧蘿山在諸暨縣南五里

靈岩山在蘇州城西二十里又名硯石山吳王之別苑在焉有館娃宮琴臺響牒廊西施洞山頂之屬

王右軍

欽定四庫全書

李太白集分韻補註  
卷二十二

十

右軍本清真瀟灑出風塵山陰過羽客愛此好鶩賓掃

素寫道經筆精妙入神書罷籠鶩去何曾別主人

齊賢曰王

羲之為右軍將軍會稽長史庾亮臨薨上疏稱羲之清真有覽裁之雅愛鶩事見前

上元夫人

上元誰夫人偏得王母嬌嵯峨三角髻餘髮散垂腰裘

披青毛錦身着赤霜袍手提羸女兒閒與鳳吹簫眉語

兩自笑忽然隨風飄

齊賢曰漢武內傳曰上元夫人道君弟子也自玄古以來得道總統

負籍亞於龜臺金母事已詳見前卷羸女秦穆公女弄玉也喜吹簫作鳳鳴

蘇臺覽古

舊苑荒臺楊柳新菱歌清唱不勝春只今唯有江西月

曾照吳王宮裏人

齊賢曰吳王夫差都蘇州有桂苑姑蘇臺春宵宮海靈館館娃閣以宮妓

千人為長夜飲造千石酒鍾作天池中作青龍舟舟中盛陳妓樂日與西施為水戲

越中覽古

越王句踐破吳歸義士還家盡錦衣宮女如花滿春殿

只今唯有鷓鴣啼

齊賢曰史記越句踐四年伐吳因而留圍之三年吳師敗復棲吳王於姑

蘇山吳王請成句踐欲許之范蠡曰謀之二十二年一旦棄之可乎乃鼓進兵吳王遂自殺越王乃葬吳王而

欽定四庫全書

李太白集分韻補註  
卷二十二

十一

誅

太宰詔

鷓鴣

見前

商山四皓

白髮四老人昂藏南山側偃蹇松雲間冥翳不可識雲  
窓拂青靄石壁橫翠色龍虎方戰爭於焉自休息秦人  
失金鏡漢祖昇紫極陰虹濁太陽前星遂淪匿一行佐  
明聖倏起生羽翼功成身不居舒卷在曾臆冥冥合元  
化茫昧信難測飛聲塞天衢萬古仰遺跡

齊賢曰陳留志韋便字宣

明囊邑人常居園中世謂之園公與河內軹人角里先生綺里李夏黃公為友避秦入商山是為四皓後說高



祖太子得不易事並見四卷雜書曰秦失金鏡喻明道也晉志北極五星在紫宮中北辰最高者又云心三星天王正位中星曰明堂天子位為大辰前星為太子後星為元子說文霓屈尅青赤或白色陰氣也郭璞曰雄曰虹謂陽盛者雌曰蜺謂暗微者以喻戚夫人也

### 過四皓墓

我行至商洛幽獨訪神仙園綺復安在雲蘿尚宛然荒涼千古跡蕪沒四墳連伊昔鍾金鼎何年閉玉泉隴寒惟有月松古漸無烟木魅風號去山精雨嘯旋紫芝高詠罷青史舊名傳今日併如此哀哉信可憐

齊賢曰唐商州上洛

郡商洛縣四皓事見  
前說文魁老物精也

峴山懷古

訪古登峴首憑高眺襄中天清遠峯出水落寒沙空弄

珠見遊女醉酒懷山公感嘆發秋興長松鳴夜風

齊賢曰峴

山在襄陽南十里鄭交甫弄珠山公簡事見前

蘇武

蘇武在匈奴十年持漢節白鴈上林飛空傳一書札牧  
羊邊地苦落日歸心絕渴飲月窟冰飢餐天上雪東還

沙塞遠北愴河梁別泣把李陵衣相看泣成血

齊賢曰天漢元

年且鞮侯單于立恐漢襲之盡歸漢使路充國等武帝嘉其義乃遣蘇武持節送匈奴使留在漢者因厚賂單于單于使衛律召降武堅辭舉劍疑之武不動單于乃幽武大窖中絕不飲食天雨雪武卧齧雪與羶毛并咽之數日不死匈奴以為神乃徙武北海無人處使牧羝武杖漢節牧羊卧起操持節毛盡落明年李陵降乃使陵至海上說之武曰必欲降武請畢今日之驩効死於前陵曰嗟夫義士陵與衛律之罪上通於天與陵決去後昭帝即位數年與匈奴和親求武等謂單于言天子射上林中得鴈足有繫帛書言武等在其澤中單于驚謝有之於是陵置酒賀武曰今足下還歸揚名於匈奴功顯於漢室雖古竹帛所載何以過陵起舞歌曰徑萬里兮度沙漠為君將兮奮匈奴路穹絕兮矢刃摧士衆滅兮名已隤老母已死雖欲報恩將安歸單于召會

武官屬還者九人武留匈奴凡十九歲李陵與蘇子卿詩攜手上河梁遊子暮何之江文通詣建平王上書曰此少卿所以仰天搥心淚盡而繼之以血也

經下邳圯橋懷張子房

子房未虎嘯破產不為家  
滄海得壯士椎秦博浪沙  
報韓雖不成天地皆振動  
潛匿遊下邳豈曰非智勇  
我來圯橋上懷古欽英風  
唯見碧流水曾無黃石公  
嘆息此人去蕭條徐泗空

齊賢曰張良事見前卷

金陵三首

晉家南渡日此地舊

一作即

長安地即帝王宅山為龍虎

盤

一作碧雨樓臺滿青山龍虎盤

金陵空壯觀天塹

一作江塞

淨波瀾醉客

回橈去吳歌且自歡

一作誰云行路難齊賢曰晉元帝南渡即帝位都于建康諸葛亮曰

鍾

阜龍盤

石城虎踞

## 其二

地擁金陵勢城迴江

一作漢

水流當時百萬戶夾道起朱

樓亡國生春草王宮沒古丘空餘後湖月波上對江州

一作瀛州

其三

六代興亡國三杯為爾歌苑方秦地少一作小山似洛陽

多古殿吳花草深宮晉綺羅併隨人事滅東逝與滄波

齊賢曰六代吳  
晉宋齊梁陳也

秋夜板橋浦汎月獨酌懷謝朓

天上何所有迢迢白玉繩斜低建章闕耿耿對金陵漢  
水舊如練霜江夜清澄長川瀉落月洲渚曉寒凝獨酌  
板橋浦古人誰可徵玄暉難再得洒洒氣填膺

齊賢曰  
春秋元

命苞曰玉衡北  
兩星為玉繩星

### 過彭蠡湖

謝公入彭蠡因此遊松門余方窺石鏡兼得窮江源前  
賞迹可見後來道空存而欲繼風雅豈云清心魂雲海  
方助興波濤何足論青嶂憶遙月綠蘿愁鳴猿碧水或

可採金膏祕莫言余將振衣去羽化出囂煩

齊賢曰興地志曰自

入湖三百三十里窮於松門東西十里青松徧於兩岸  
石鏡見前繼風雅者繼靈運也士贇曰晉許邁少恬靜  
不慕仕進徧遊名山採藥欲斷穀自  
後莫測所終好道者皆謂之羽化

入彭蠡經松門觀石鏡緬懷謝康樂題詩書遊

覽之志

二篇或同或異故併錄之

謝公之彭蠡因此遊松門余方窺石鏡兼得窮江源欲  
將繼風雅豈徒清心魂前賞逾所見後來道空存況屬  
臨汎美而無洲渚喧漾水向東去漳流直南奔空濛三  
川夕回合千里昏青桂隱遙月綠楓鳴愁猿水碧或可  
采金精秘莫論吾將學仙去冀與琴高言

士贇曰山海經曰荆山漳

水出焉而東南流注于汨羅江琴高事見前



廬江主人婦

孔雀東飛何處棲廬江小吏仲卿妻為客裁縫君自見

城烏獨宿夜空啼

齊賢曰虞衡志孔雀生高山喬木之上人取其雛育之喜卧沙中以沙自

浴自拍甚適蓋巢於山林下浴海岸雄者尾長數尺生三年尾始長金碧晃曜時時自奮張其尾團如錦橋俗謂之朝按朝時自晨至午皆朝人聚觀之則奮迅不已若矜街者古有烏夜啼曲士贇曰古樂府有焦仲卿妻詞仲卿為府吏不歸妻之父母逼之改嫁妻守節而死此引以比之也

陪宋中丞武昌夜飲懷古

清景南樓夜風流在武昌使公愛秋月乘興坐胡床龍

笛吟寒水天河落曉霜我心還不淺懷古醉餘觴懷古一作

留客齊賢曰晉書庾亮鎮武昌諸佐吏殷浩之徒乘秋夜往共登南樓俄而亮至諸人將起避之亮徐曰諸君少住老子於此興復不淺庾據胡牀與浩等談詠竟夕武昌郡治武昌縣治故東鄂也楚子熊渠封中子紅於此乃唐鄂州江夏郡之武昌縣而唐鄂州乃晉武昌郡之沙羨縣沙羨即夏口對沔曰如此則晉武昌自有南樓今鄂州南樓特後來名之耳太白豈未之考耶

望鸚鵡洲懷禰衡

魏帝營八極蟻觀一禰衡黃祖斗筭人殺之受惡名吳江賦鸚鵡落筆超羣英鏘鏘振金玉句句欲飛鳴鵲鵲

啄孤鳳千春傷我情五嶽起方寸隱然詎可平才高竟

何施寡識冒天刑至今芳洲上蘭蕙不忍生

齊賢曰後漢書

平原人有才辨而尚氣曹操欲見之不肯往操懷忿欲殺之送劉表表不能容以江夏太守黃祖性急故送衡與之祖長子射為章陵太守大會賓客有獻鸚鵡者射舉厄於衡前曰願先生賦之衡筆不停綴文不加點後黃祖竟殺之斗筭言器小也鸛鶚以喻黃祖孤鳳以喻衡寡識冒天刑太白傷禍衡長傲使氣以喪其身也

### 宿巫山下

昨夜巫山下猿聲夢裏長桃花飛綠水三月下瞿塘雨

色風吹去南行拂楚王高丘懷宋玉訪古一霑裳

士贇曰巫

山及宋玉賦高  
丘神女事見前

### 金陵白楊十字巷

白楊十字巷北夾湖溝道不見吳時人空生唐年草天

地有反覆宮城盡傾倒六帝餘古丘樵蘇泣遺老

齊賢曰六

帝吳晉宋齊梁陳晉灼  
曰樵取薪蘇取草也

### 謝公亭

蓋謝朓范  
雲之所遊

謝公離別處風景每生愁客散青天月山空碧水流池

花春映日窓竹夜鳴秋今古一相接長歌懷舊遊

齊賢曰世

說過江諸人每至新亭飲宴周顗中坐而嘆曰風景不殊舉目有江河之異皆相視流涕士贇曰列子古猶今也

### 紀南陵題五松山

聖達有去就潛光愚其德魚與龍同池龍去魚不測當時版築輩豈知傳說情一朝和殷羹光氣為列星伊尹生空桑捐庖佐皇極桐宮放太甲攝政無愧色三年帝道明委質終輔翼曠哉至人心萬古可為則時命或大繆仲尼將一作其奈何鸞鳳忽覆巢麒麟不來過龜山蔽

欽定四庫全書

李太白集分類補註  
卷二十二

十八

魯國有斧且無柯歸來歸去來

一作歸去來歸去

宵濟越洪波

齊賢曰左傳聖達節老子曰盛德容貌若愚傳岩在虞  
號界通道所經有澗水壞道常使胥靡刑人築護此道  
說賢而隱代胥靡築之以供食說命高宗夢得說使百  
工營求諸野得諸傅岩爰立作相莊子傅說之相武丁  
乘東維騎箕尾而比於列星列子伊尹生空桑注伊尹  
母居伊水上既孕夢神告曰舊水出而東走無顧明日  
視舊水出東走十里顧視其邑盡為水身因化為空桑  
有莘氏女子採桑得嬰兒于空桑中命曰伊尹庖人養  
之長而賢為殷相伊訓成湯既沒伊尹奉嗣王祗見厥  
祖明言烈祖之成德以訓于王王未足變營于桐宮王  
祖桐宮居憂克終允德伊尹以冕服奉嗣王歸于亳詩  
箋云龜山蒙山也柯斧柄士贇曰書注皇太極中也太  
甲成湯  
長孫

夜泊牛渚懷古

此地即謝尚聞袁宏詠史處出處已見前

牛渚西江夜青天無片雲登舟望秋月空憶謝將軍余

亦能高詠斯人不可聞明朝挂帆席

一作洞庭去

楓葉落

一作

正紛紛

姑孰十詠

姑孰溪

愛此溪水閒乘流興無極漾楫怕鷗驚垂竿待魚食波

翻曉霞影岸疊春山色何處浣紗人紅顏未相識

齊賢曰宣

欽定四庫全書

李太白集分類補註

十九

州當塗縣姑孰溪自蕪  
湖東流至采石入江

丹陽湖

湖與元氣連風波浩難止天外賈客歸雲間片帆起龜

遊蓮葉上烏宿蘆花裏少女棹歸舟歌聲逐流水

齊賢曰史

龜策傳曰龜千歲乃遊蓮葉之上士贇曰丹陽湖在當  
塗縣東南七十里春秋元命苞曰水者五行始焉元氣  
之津也

謝公宅

青山日將暝寂寞謝公宅竹裏無人聲池中虛月白荒



庭衰草徧廢井蒼苔積唯有清風閒時時起泉石

齊賢曰太

白渡牛渚至姑孰悅青山欲終焉謝公謝眺也

### 陵歌臺

曠望登古臺臺高極人目疊嶂列遠空雜花間平陸閒

雲入窓牖野翠生松竹欲覽碑上文苔侵豈堪讀

士贇曰臺

在當塗黃山上宋武帝南遊登此因建離宮焉

### 桓公井

桓公名已古廢井曾未竭石甃冷蒼苔寒泉湛孤月秋

來桐暫落春至桃還發路遠人罕窺誰能見清潔

士贇曰桓

公井在當塗東五里白紵山上桓溫領妓遊山奏樂好為白紵歌因名焉

### 慈姥竹

野竹攢石生含烟映江島翠色落波深虛聲帶寒早龍吟曾未聽鳳曲吹應好不學蒲柳凋貞心嘗自保

士贇曰當

塗縣西北四十五里有慈姥山山上出竹堪為簫管李善文選注慈姥山竹作簫笛有妙聲故歷代常給樂府又呼為鼓吹山

### 望夫山

願望臨碧空，怨情感離別。江草不知愁，巖花但爭發。雲

山萬重隔，音信千里絕。春去秋復來，相思幾時歇。

齊賢曰：望

夫化石事見前卷。山在當塗縣正對和州郡樓。

### 牛渚磯

絕壁臨巨川，連峯勢相向。亂石流湫間，迴波自成浪。但

驚羣木秀，莫測精靈狀。更聽猿夜啼，憂心醉江上。

士贇曰：牛

渚山在當塗縣北三十里山下有磯，古津渡也。

### 靈墟山

丁令辭世人拂衣向仙路伏鍊九丹成方隨五雲去松

蘿蔽幽洞桃杏深隱處不知曾化鶴遼海歸幾度

士贊曰丁

令鶴事見前靈墟山在當塗南十里

天門山

迴出江山上雙峯自相對岸映松色寒石分浪花碎參

差遠天際縹緲晴霞外落日舟去遙回首沉青靄

齊賢曰天

門山見

前卷

李太白集分類補註卷二十二

欽定四庫全書

李太白集分類補註卷二十三

宋 楊齊賢 集註

元 蕭士贇 補註

閒適

與元丹丘方城寺談玄作

茫茫大夢中惟我獨先覺  
騰轉風火來假合作容貌滅  
除昏疑盡領畧入精要  
澄慮觀此身因得通寂照  
朗悟

欽定四庫全書

李太白集分經補註  
卷二十三

前後際始知金仙妙幸逢禪居人酌玉坐相召彼我俱  
若喪雲山豈殊調清風生虛空明月見談笑怡然青蓮

宮永願恣遊眺

士贇曰莊子曰且有大覺而後知此其大夢也而愚者自以為覺竊竊然知之

騰轉風火來假合作容貌此言人之初身由地水火風四大假合而成也虛皇四十九章經云子知悲人不能悲身地水火風假合四大延土為器托炬火中而得堅固子身猶器法猶炬火能捍子身成不壞質維摩詰經云是身無我為如火是身無壽為如風是身無作風力所轉楞嚴經佛問圓通文殊祖師法王子說偈對佛曰淨極光通達寂照含虛空却來觀世間猶如夢中事又曰爾時世尊問維摩詰汝欲見如來將以何等觀如來乎維摩詰言如自觀身寶相觀佛亦然我觀如來前際不來後際不去今則不住不觀楞嚴經云風性無體若生

虛空汝衣不動何因無佛空性常住風應常生若無風時虛空當滅若有生滅不名虛空名為虛空云何風出虛空寂然不參流動如來藏中性空真風清淨本然周徧法界

### 尋高鳳石門山中元丹丘

尋幽無前期乘興不覺遠蒼崖渺難涉白日忽欲晚未窮三四山已歷千萬轉寂寂聞猿愁行行見雲收高松來好月空谷宜清秋溪深古雪在石斷寒泉流峰巒秀中天登眺不可盡丹丘遙相呼顧我忽而哂遂造窮谷間始知靜者閒留歡達永夜清曉方言還

士贊曰翰曰  
中天言高及

欽定四庫全書

李太白集分題刊註  
卷二十三

天半

安州般若寺水閣納涼喜遇薛員外又

翛然金園賞遠近含晴光樓臺成海氣草木皆天香忽  
逢青雲士共解丹霞裳水退池上熱風生松下涼吞討  
破萬象塞窺臨衆芳而我遺有漏與君用無方心垢都

已滅永言題禪房

齊賢曰晉志海傍蜃氣成樓臺士贊  
曰黃庭經云靈睢君衣青錦丹裳藏

經起信論問曰諸佛無邊方便能於十方利益衆生何  
故衆生常不見佛或觀神變或問說法答曰如來實有  
如是方便但要衆生其心清淨乃為現身如鏡有垢色  
像不見垢除則現衆生亦爾心未離垢法身不現垢離



現則

魯中都東樓醉起作

昨日東樓醉

一作城飲

還應

一作歸來

倒接籬阿誰扶上馬不省

下樓時

士贊曰倒接籬見前

對酒醉題屈突明府廳

陶令八十日長歌歸去來故人建昌宰借問幾時迴風

落吳江雪紛紛入酒杯山翁今已醉舞袖為君開

齊賢曰陶

潛為彭澤令八十日唐

建昌縣隸洪州豫章郡

月下獨酌四首

花間一壺酒，獨酌無相親。  
舉杯邀明月，對影成三人。  
月既不解飲，影徒隨我身。  
暫伴月將影，行樂須及春。  
我歌月徘徊，我舞影凌亂。  
醒時同交歡，醉後各分散。  
永結無

情遊相期邈雲漢

士贇曰：莊子人有畏影而走者，走愈疾而影不離身。

其二

天若不愛酒，酒星不在天。  
地若不愛酒，地應無酒泉。  
天若愛酒，酒星在；地若愛酒，地應有酒泉。  
地既愛酒，愛酒不愧天。  
已聞清比聖，復道濁如賢。  
賢聖

既已飲何必求神仙三杯通大道一斗合自然但得酒

中趣勿為醒者傳

齊賢曰晉志軒轅右角兩五星曰酒星主享宴飲食五星守酒旗天下大

脯有酒肉財物賜漢武太初元年開酒泉郡師古曰城下有金泉泉水如酒魏徐邈醉酒太祖怒其已甚曰平

時醉客謂酒清者為聖人濁者為賢人耳

### 其三

三月咸陽城

一作時

千花晝如錦誰能春獨愁對此徑須

飲窮通與修短造化夙所稟一樽齊死生萬事固難審

醉後失天地兀然就孤枕不知有吾身此樂最為甚

齊賢

曰唐咸陽郡  
乃秦之故都

其四

窮愁千萬端美酒三百杯  
愁多酒雖少酒傾愁不來  
所以知酒聖酒酣心自開  
辭粟卧首陽屢空飢顏回  
當代不樂飲虛名安用哉  
蟹螯即金液糟丘是蓬萊  
且須飲

美酒乘月醉高臺

齊賢曰辭粟卧首陽及  
金液糟丘蓬萊並見前

春歸終南山松龕舊隱

我來南山陽事事不異昔  
却尋溪中水還望岩下石  
舊

薇緣東窓女蘿遶北壁別來能幾日草木長數尺且復

命酒樽獨酌陶

喜也

永夕

冬夜醉宿龍門覺起言志

醉來脫寶劍旅憩高堂眠中夜忽驚覺起立明燈前開  
軒聊直望曉雪河水壯哀哀歌苦寒鬱鬱獨惆悵傳說  
版築臣李斯鷹犬人歛起匡社稷寧復長艱辛而我胡  
為者嘆息龍門下富貴未可期殷憂向誰寫去去淚滿  
襟舉聲梁甫吟青雲當自致何必求知音

齊賢曰傳說  
版築李斯鷹

犬事見前唐河南府河南縣有龍門山抵天津

尋山僧不遇作

金陵

石徑入丹壑松門閉青苔閒階有鳥跡禪室無人開窺  
牕見白拂挂壁生塵埃使我空歎息欲去仍徘徊香雲  
徧山起花雨從天來已有空樂好况聞青猿哀了然絕  
世事此地方悠哉

齊賢曰建康圖經梁武時有僧講經于長干山天雨寶花今有雨花臺

過汪氏別業二首

遊山誰可遊子明與浮丘疊嶺礙河漢連峯橫斗牛汪

生面北阜池館清且幽我來感意氣掄魚列珍羞掃石  
待歸月開池漲寒流酒酣益爽氣為樂不知秋

齊賢曰  
陵陽竇

子明與浮丘公也士贇曰為樂不知秋者蓋言  
為樂之極不知老之將至而忘其悲秋之思也

## 其二

疇昔未識君知君好賢才隨山起館宇鑿石營池臺星

一作  
大

火五月中景風從南來數枝石榴發一丈荷花開

恨不當此時相過醉金罍我行植木落月苦清猿哀永  
夜達五更吳歛送瓊杯酒酣欲起舞四座歌相催日出

遠海明軒車且徘徊更遊龍潭去枕石拂莓苔

齊賢曰堯典曰

永星火以正仲夏註曰夏言星火獨指房心宋玉招魂吳歛蔡謳奏大呂士贊曰史律書曰景風居南方景者

言陽氣通曉

故曰景風

### 待酒不至

玉壺繫青絲沽酒來何遲山花向我笑正好銜杯時晚

酌東牕下流鶯復在茲春風與醉客今日乃相宜

齊賢曰秦

王曰玉壺必求其所以盛酒

### 獨酌



春草如有意羅生玉堂陰東風吹愁來白髮坐相侵獨

酌勸孤影聞歌面芳林長松爾何知

一作本無情

蕭瑟為誰

吟手舞石上月膝橫花間琴過此一壺外悠悠非我心

一本云春草遍綠野新鶯有佳音落日不盡歡恐為愁所侵獨酌勸孤影聞歌面芳林清風尋空來岩松與共吟手舞石上月膝橫花下琴過此一壺外悠悠非我心齊賢曰漢文翁為蜀守作石室名玉堂

### 友人會宿

滌蕩千古愁留連百壺飲良宵宜清談皓月誰能寢醉

來卧空山天地即衾枕

士贇曰此詩太白蓋用劉伶酒德頌幕天席地縱意所如之意

春日獨酌二首

東風扇淑氣，水木榮春暉。  
白日照綠草，落花散且飛。  
孤雲還空山，衆鳥各已歸。  
彼物皆有託，吾生獨無依。  
對此石上月，長醉歌芳菲。

其二

我有紫霞想，緬懷滄洲間。  
思對一壺酒，澹然萬事閒。  
橫琴倚高松，把酒望遠山。  
長空去鳥沒，落日孤雲還。  
但恐光景晚，宿昔成秋顏。

金陵江上遇蓬池隱者

時於落星石上以紫綺裘換酒為歡

心愛名山遊身隨名山遠羅浮麻姑臺此去或未返遇  
君蓬池隱就我石上飯空言不成歡強笑惜日晚綠水  
向鴈門黃雲蔽龍山嘆息兩客鳥徘徊吳越間共語一  
執手留連夜將久解我紫綺裘且換金陵酒酒來笑復  
歌興酣樂事多水影弄月色清光奈愁何明晨掛帆席

離恨滿滄波

齊賢曰羅浮山麻姑壇事見前唐蓬池蓬山郡治蓬池縣唐代州鴈門縣有關

月夜聽盧子順彈琴

閒夜坐明月幽人彈素琴忽聞悲風調宛若寒松吟白

雪亂纖手綠水清虛心鍾期久已沒世上無知音

齊賢曰列

子伯牙鼓琴鍾子期善聽鍾子期死伯牙擗琴絕絃終身不更復鼓琴以為無足與鼓琴者白雪曲名

### 清溪半夜聞笛

羌笛梅花引吳溪隴水情

一作清

寒山秋浦月腸斷玉關

聲

一作情齊賢曰梅花引曲名士贊曰隴水玉關事見前

### 日夕山中忽然有懷

久卧青

一作名

山雲遂為青

一作名

山客山深雲更好賞弄

終日夕月銜樓間峰泉漱階下石素心自此得真趣非  
外惜鼯啼桂方秋風滅籟歸寂緬思洪崖術欲往滄海  
隔雲車來何遲撫几空嘆息

齊賢曰鼯鼠如猿肉翼若蝙蝠聲如人號神仙傳衛

叔卿與數人博其子度曰與博者為誰曰是洪崖先生

### 夏日山中

嬾搖白羽扇裸體青林中脫巾掛石壁露頂洒松風

### 山中與幽人對酌

兩人對酌山花開一杯一杯復一杯我醉欲眠卿且去明

欽定四庫全書

卷二十三

朝有意抱琴來

齊賢曰陶潛飲酒若先醉便語客我醉欲眠卿且去

春日醉起言志

處世若大夢胡為勞其生所以終日醉頽然卧前楹覺  
來盼庭前一鳥花間鳴借問此何時春風語流鶯感之

欲嘆息對酒還自傾浩歌待明月曲盡已忘情

士贇曰太白此

詩擬陶之作也

廬山東林寺夜懷

我尋青蓮宇獨往謝城闕霜清東林鐘水白虎溪月天

香生虛空天樂鳴不歇宴坐寂不動大千入毫髮湛然

冥真心曠却斷出沒

齊賢曰青蓮宇梵宮也廬山寺及東林虎溪事見前士贇曰維摩詰

經曰舍利佛言憶念我昔曾於林中宴坐樹下時維摩詰來謂我言唯舍利佛不必是坐為宴坐也夫宴坐者不於三界現身是為宴坐不起滅定而現諸威儀是為宴坐不捨道法而現見事是為宴坐心不在內亦不在外是為宴坐於諸見不動而修行三十七品是為宴坐不斷煩惱而入涅槃是為宴坐楞嚴經云一切衆生從無始來生死相續皆由不知常住真心性淨明體用諸妄想此想不真故有輪轉釋藏經十六祖羅侯羅見僧迦難入定方起尊者曰汝身定耶心定耶曰身心俱定尊者曰何有出入曰雖有出入不失定相如金在井全體常寂

尋雍尊師隱居

群峭碧摩天，逍遙不記年。  
撥雲尋古道，倚樹聽流泉。

暖青牛卧松高白，鶴眠語來江色暮。  
獨自下寒煙。

齊賢曰：青

牛花葉上小青虫也。有兩角如蝸牛，故云鶴經白鶴陽鳥十六年小變，六十大變，千六百年形定，色白。

與史郎中欽聽黃鶴樓上吹笛

一為遷客去長沙，西望長安不見家。  
黃鶴樓中吹玉笛，

江城五月落梅花。

齊賢曰：梅花落笛中曲也。

對酒



勸君莫拒杯春風笑人來桃李如舊識傾花向我開流  
鶯啼碧樹明月窺金罍昨日朱顏子今日白髮催棘生  
石虎殿鹿走姑蘇臺自古帝王宅城闕閉黃埃君若不  
飲酒昔人安在哉

齊賢曰晉石虎篡位作大武殿於襄國昔子胥諫吳王王不用乃曰臣今

見麋鹿遊姑蘇之臺也

### 醉題王漢陽廳

我似鷓鴣鳥南遷嬾北飛時尋漢陽令取醉月中歸

齊賢

曰異物志鷓鴣鳥其志懷南不思北徂漢陽縣在大別山之西

嘲王歷陽不肯飲酒

地白風色寒雪花大如手笑殺陶淵明不飲杯中酒浪

撫一張琴虛栽五株柳空負頭上巾吾於爾何有

士贊曰陶

潛傳語  
詳見前

獨坐敬亭山

衆鳥高飛盡孤雲獨去閒相看兩不厭只有敬亭山

齊賢

曰敬亭山  
見前註

自遣

對酒不覺暝落花盈我衣醉起步溪月鳥還人亦稀

齊賢

日日入

日暝

訪戴天山道士不遇

犬吠水聲中桃花帶雨濃樹深時見鹿溪午不聞鐘野竹分青靄飛泉挂碧峰無人知所去愁倚兩三松

秋日與張少府楚城韋公藏書高齋作

日下空亭暮城荒古跡餘地形連海盡天影落江虛舊賞人雖隔新知樂未疎彩雲思作賦丹壁間藏書楂擁

隨流葉萍開出水魚夕來秋興滿回首意何如

齊賢曰  
楂水中

浮木

### 懷思

#### 秋夜獨坐懷故山

小隱慕安石遠遊學屈平天書訪江海雲卧起咸京入  
侍瑤池宴出陪玉輦行誇胡新賦作諫獵短書成但奉

紫霄顧非邀青史名

齊賢曰謝安初盤桓東山屢違朝  
命及登台輔常有東山之志屈原

名平作遠遊云悲時俗之迫阨兮願輕舉而遠遊咸京  
即今之咸陽也司馬相如長楊賦及諫獵事已見前

莊周空說劍墨翟恥論兵拙薄遂疎絕歸閒事耦耕顧  
無蒼生望空愛紫芝榮寥落暝霞色微茫舊壑情秋山

綠蘿月今夕為誰明

齊賢曰莊子有說劍篇淮南子曰楚欲攻宋墨子聞而悼之至郢見

楚王曰聞王將攻宋計必得宋而後攻之乎王曰不必得宋曷為攻之墨子曰臣見王必傷義而不得宋王曰公輸天下之巧士作雲梯之械以攻宋曷為弗取墨子曰令公輸設攻臣請守之於是公輸班設攻宋之機墨子設守宋之備九攻而墨子九備之弗能入乃輟不攻宋

憶崔郎中宗之遊南陽遺吾孔子琴撫之潛然

感舊

昔在南陽城唯飡獨山蕨憶與崔宗之白水弄素月時  
過菊潭上縱酒無休歇泛此黃金花頽然清歌發一朝  
摧玉樹生死殊飄忽留我孔子琴琴存人已歿誰傳廣

陵散但哭邛山骨泉戶何時明長掃狐兔窟

齊賢曰唐鄧州南陽

郡冢宇記金陵溧水縣有獨山在縣東十里不與群山連白水邑名見前咸弘之荊州記菊水出穰縣芳菊被匡水極甘香嵇康將刑東市顧日影索琴彈之曰昔袁孝尼從吾學廣陵散吾每靳之廣陵散於今絕矣

### 憶東山二首

不向東山久薔薇幾度花白雲還自散明月落誰家

其二

我今攜謝妓長嘯絕人群欲報東山客開關掃白雲

齊賢

曰謝安攜妓

東山事見前

望月有懷

清泉映疎松不知幾千古寒月搖清波流光入牕戶對

此空長吟思君意何深無因見安道興盡愁人心

齊賢曰晉

書王子猷訪戴安道

興盡而返事見前

對酒憶賀監二首

并序

太子賓客賀公於長安紫極宮一見余呼余為謫仙人因解金龜換酒為樂悵然有懷而作是詩

四明有狂客風流賀季真長安一相見呼我謫仙人昔

好杯中物翻為松下塵金龜換酒處却憶淚沾巾

齊賢曰賀

知章字季真與陸象先善象先日季真清談風流吾一日不見鄙吝生矣元宗時為太子賓客授秘書監晚節放誕自號四明狂客

其二

狂客歸四明山陰道士迎敕賜鏡湖水為君臺沼榮人



亡餘故宅空有荷花生念此杳如夢淒然傷我情

齊賢曰四

明山見前賀知章天寶初病夢遊帝居數夕寤乃請為道士還鄉里詔許之以宅為千秋觀而居又求周官湖數頃為放生池有詔賜鏡湖剡川一曲既行帝賜詩皇太子百官餞送擢其子一人為會稽郡司馬賜緋魚使

侍

養

### 重憶一首

欲向江東去定將誰舉杯稽山無賀老却棹酒船回

齊賢

曰知章越州

會稽郡人

### 春滯沅湘有懷山中

沅湘春色還風暖煙草綠古之傷心人於此腸斷續予  
非懷沙客但美採菱曲所願歸東山寸心於此足

落日憶山中

雨後煙景綠晴天散餘霞東風隨春歸發我枝上花花

落時欲暮見此令人嗟願遊名山去學道飛丹砂

士贊  
曰丹

砂見  
前

憶秋浦桃花舊遊時竄夜郎

桃花春水生白石今出沒搖蕩女蘿枝半搖青天月不

知舊行徑初拳幾枝巖三載夜郎還於茲鍊金骨

齊賢曰唐

夜郎縣隸溱州  
桃花水見前

李太白集分類補註卷二十三

欽定四庫全書

李太白集分類補註卷二十四

宋 楊齊賢 集註

元 蕭士贊 補註

感遇

越中秋懷

越水遶碧山周迴數千里乃是天鏡中分明畫相似一本

首四句云蹈海思仲連遊山慕康樂攀雲窮千峯弄水涉萬壑下同愛此從冥搜永懷臨

湍遊一爲滄波客十見紅蕖秋觀濤壯天險望海令人  
愁路遐迫西照歲晚悲東流何必探禹穴逝將歸蓬丘  
不然五湖上亦可乘扁舟

效古二首

朝入天苑中謁帝蓬萊宮青山映輦道碧樹搖煙空謬  
題金閨籍得與銀臺通待詔奉明主抽毫頌清風歸時  
落日晚蹢躅浮雲驄人馬本無意飛馳自英雄入門紫  
鴛鴦金井雙梧桐清歌弦古曲美酒沽新豐快意且爲

樂列筵坐羣公光景不可留生世如轉蓬早達勝晚遇

羞比垂釣翁

齊賢曰新豐事見前士贊曰此詩樂府富貴之體也

其二

自古有秀色西施與東鄰蛾眉不可妬况乃效其曠所以尹婕妤羞見邢夫人低頭不出氣塞默少精神寄語

無鹽子如君何足珍

齊賢曰西施與東鄰曠及尹婕妤羞見邢夫人人事並見前士贊曰此

詩刺時以色相尚而不好德者故末句反言之曰寄語無鹽子如君何足珍也

擬古十二首

士贊曰擬古者擬古詩也古人多有此體至於句意亦不大相遠焉

青天何歷歷明星如白石黃姑與織女相去不盈尺銀

河無鵲橋非時將安適閨人理紈素遊子悲行役瓶冰

知冬寒霜露欺遠客客似秋葉飛飄飄不言歸別後羅

帶長愁寬去時衣乘月託宵夢因之寄金徽

齊賢曰古樂府東飛

伯勞西飛燕黃姑織女時相見淮南子烏鵲填河成橋而渡織女又曰見瓶水之冰而知天下之寒唐羈縻州

有金徽州隸振武軍士贊曰古詩衆星何歷歷梁宗懔荆楚歲時記黃姑即河鼓也蓋託詞所致云爾雅河鼓

謂之牽牛庾師成遠期篇憶別春花飛已見秋葉稀淚眼羞明鏡愁帶減寬衣得書未言反夢見道應歸坐使

紅顏歌獨掩青樓扉此篇傷時窮兵黷武行役無期度男女怨曠不得遂其家室之情感時而悲者焉哀而不



傷怨而不誹真有國風之體  
此晦菴之所謂聖於詩者歟

其二

高樓入青天下有白玉堂  
明月看欲墮當牕懸清光  
遙夜一美人羅衣沾秋霜  
含情弄柔瑟彈作陌上桑  
絃聲何激烈烈風卷遶飛梁  
行人皆躑躅棲鳥去迴翔  
但寫妾

意苦莫辭此曲傷願逢同心者  
飛作紫鴛鴦

齊賢曰古詩西北有

高樓玉堂陌上桑及韓娥歌響繞梁鴛鴦事並見前士  
贊曰長門賦懸明月以自照兮徂清夜於洞房此詩喻  
賢者懷才抱藝有以聳動人之耳目而不屑以  
身輕許於人思得同心同德者而依附之也

其三

長繩難繫日自古共悲辛黃金高北斗不惜買陽春  
石火無留光還如世中人卽事已如夢後來我誰身  
提壺

莫辭貧取酒會四鄰仙人殊恍惚未若醉中真

齊賢曰古樂府

鑿石見火能幾時潘岳詩欸如敲石火提壺云提壺沽美酒士贇曰此篇達生者之詩也古詩中有此體

其四

清都綠玉樹灼爍瑤臺春攀花弄秀色遠贈天仙人  
香風送紫蘂直到扶桑津取掇世上艷所貴心之珍  
相思

傳一笑聊欲示情親

齊賢曰列子云清都紫微鈞天廣樂帝之所居士贊曰此遊仙詩體

其五

今日風日好明日恐不如春風笑於人何乃愁自居吹  
簫舞彩鳳酌醴鱠神魚千金買一醉取樂不求餘達士  
遺天地東門有二疏愚夫同瓦石有才知卷舒無事坐

悲苦塊然涸轍鮒

齊賢曰蕭史吹簫感鳳凰來事見前漢書疏廣疏受稱病乞骸骨上許之

公卿故人邑子祖道供帳東都門外士贊曰按鮒字本作魚若作魚是重一字今當作鮒莊子守鮓鮓注曰鮓音附又音蒲李云鮓鮓皆小魚也當作鮓音蒲無疑此篇亦達生而能與時卷舒者其太白之素志歟

其六

運速天地閉胡風結飛霜百草死冬月六龍頽西荒太白出東方彗星揚精光鴛鴦非越鳥何爲眷南翔惟昔鷹將犬今爲侯與王得水成蛟龍爭池奪鳳凰北斗不

酌酒南箕空簸揚

齊賢曰晉志太白西方秋金義也進退以俟兵其出東方失行中國敗妖

星一曰彗星所謂掃星小者數寸長或竟天見則兵起大水主除舊布新彗體無光傳日而爲光故夕見則東指辰見則西指在日南北皆隨日光而指鷹將犬言昔韜鷹牽犬獵於田野今皆爲王侯矣大東詩曰維南有箕不可以簸揚維北有斗不可以挹酒漿士贇曰按此篇當是太白從永王璘時嘗作詩諷王勤王而王不從

知王不足與有爲故作是詩也運速天地閉喻明皇晚年賢人隱而羣小用事也胡風結飛霜喻祿山兵叛也百草死冬月喻人民遭殺戮也六龍頽西荒喻明皇西幸也太白出東方彗星揚精光喻兵興除舊布新也鴛鴦非越鳥何爲眷南翔喻王原非南人何爲眷眷於南方也惟昔鷹將犬今爲侯與王得水成蛟龍爭池奪鳳凰喻起於行伍而能立功者已致高位也今卒伍之徒能立功者尚致高位王何爲眷眷然擁兵南方翱翔江上而不爲勤王之舉以立功名取爵位也哉北斗不酌酒南箕空簸揚喻王終不足與有爲如北斗之空有斗名而不可以挹酒漿南箕之空有箕名而不可以簸揚也言有盡而意無窮豈後人作詩明譏顯刺者所可同哉

日語

## 其七

世路今太行迴車竟何託萬族皆凋枯遂無少可樂曠  
野多白骨幽魂共銷鑠榮貴當及時春華宜照灼人非  
崑山玉安得長璀璨身沒豈不朽榮名在麟閣

士贊曰  
李善曰

春華喻少時也此篇乃熟識世故同歸  
於盡惟當因時立功名以傳不朽耳

其八

月色不可掃客愁不可道玉露生秋衣流螢飛百草日  
月終銷毀天地同枯槁蟪蛄啼青松安見此樹老金丹  
寧誤俗昧者難精討爾非千歲翁多恨去世早飲酒入

玉壺藏身以爲寶

齊賢曰月令季夏之月腐草化爲螢  
司馬相如云螻蛄寒蟬也一名蜉蝣

春生夏死夏生秋死神仙傳壺公賣藥於汝南市日入  
後跳入壺中士贇曰老子曰人之生也柔弱其死也堅  
強萬物草木之生也柔脆其死也枯槁太白素志學仙  
此詩是反古詩中服食求神仙多爲藥所誤之意猶反

騷云

其九

生者爲過客死者爲歸人天地一逆旅同悲萬古塵月

兔空擣藥扶桑已成薪白骨寂無言青松豈知春前後

更嘆息浮榮何足珍

士贇曰古者謂死人爲歸人莊  
子曰悲夫世人直爲物逆旅耳

其十

僊人騎綵鳳，昨下閭風岑。海水三清淺，桃源一見尋。遺  
我綠玉杯，兼之紫瓊琴。杯以傾美酒，琴以閒素心。一物  
非世有，何論珠與金。琴彈松裏風，杯勸天上月。風月長  
相知，世人何倏忽。  
齊賢曰：東方朔十洲記，崑崙有三角  
一角正北，上正北辰星之曜，名閭風  
巔。

其十一

涉江弄秋水，愛此荷花鮮。攀荷弄其珠，蕩漾不成圓。佳



期綵雲重欲贈隔遠天相思無由見悵望涼風前

士贊曰此

比興之詩也首兩句喻賢者慕君之爵位而欲仕也三句四句喻賢者纔得位而害之者已至也佳期是與佳人相期也釋楚詞者曰不敢指言君尊故託辭曰佳人也彩雲重者喻女謁讒夫之昌盛也欲贈隔遠天者喻賢者欲有所獻言於君去天遠而爲女謁讒夫之所間隔也相思無由見悵望涼風前者喻雖思君而無從見君惟有悵望涼風之前曰寄吾眷戀之意云耳涼風亦薄德之形容也辭微意顯可謂怨而不誹者矣

## 其十二

去去復去去辭君還憶君漢水旣殊流楚山亦分人  
生難稱意豈得長爲羣越燕喜海日燕鴻思朔雲別久

容華晚琅玕不能飯日落知天昏夢長覺道遠望夫登

高山化石竟不返

齊賢曰淮南子曰西方之美者有崑崙之球琳琅玕註球琳琅玕皆美玉

登山望夫化石事見前卷士贇曰此篇其太白去國之時所作乎身在江湖心居魏闕懷君憂國之意藹然見於言辭之表末四句意是嗟嘆之詞雖遭時昏亂隔絕遠方然愛君之心猶石之堅也辭嚴意婉悲夫

### 感興八首

瑤姬天帝女精彩化朝雲宛轉入宵夢無心向楚君錦

衾抱秋月綺席空蘭芬茫昧竟誰測虛傳宋玉文

齊賢曰襄

陽耆舊傳云赤帝女瑤姬未行而卒葬于巫山之陽故曰巫山之女楚王令宋玉賦神女事見前

其二

洛浦有宓妃飄飄雪爭飛輕雲拂素月了可見清輝解

珮欲西去含情詎相違香塵動羅襪綠水不沾衣陳王

徒作賦神女豈同歸好色傷大雅多爲世所譏

齊賢曰漢書音

義云宓妃宓義氏之女溺洛水爲神曹植洛神賦曰髣髴兮若輕雲之蔽月飄飄兮若流風之迴雪又曰願誠

素之先達兮解玉珮以要之又曰凌波微步羅襪生塵士贇曰高唐神女二賦乃宋玉寓言以成其文章洛神

賦則子建擬之而作後世之人如癡子聽人說夢以爲誠有是事至爲傳奇以實之惟太白知其託辭而譏之

可謂識見

高遠者矣

其三

裂素持作書將寄萬里懷眷眷待遠信竟歲無人來征鴻務隨陽又不爲我棲委之在深篋蠹魚壞其題何如

投水中流落他人開不惜他人開但恐生是非

齊賢曰鄭玄注

禮記曰素生帛也孔安國曰隨陽之鳥鴻鴈之屬蠹魚書中蟲也士贇曰晉書殷羨字洪橋爲豫章太守都下人士因其致書者百餘匣行次石頭皆投之水中曰沉者自沉浮者自浮殷洪橋不爲致書郵

其四

芙蓉嬌綠波桃李誇白日偶蒙春風榮生此艷陽質豈

無佳人色但恐花不實宛轉龍火飛零落互相失詎知

凌寒松千載長守一

士贊曰按此篇已見二卷古詩四十七首必是當時傳寫之誤編詩

者不能別姑存于此卷觀者試以首句比並而論美惡顯然識者自見之矣

### 其五

十五遊神仙仙遊未曾歇吹笙吟松風汎瑟窺海月西

山玉童子使我鍊金骨欲逐黃鶴飛相呼向蓬闕

士贊曰此

比興之詩以喻賢者相招以求祿仕

### 其六

西國有美女結樓青雲端蛾眉艷曉月一笑傾城歡高  
節不可奪烟心如凝丹常恐彩色晚不爲人所觀安得  
配君子共乘雙飛鸞士贊曰此篇喻賢者有所抱負審  
所去就不肯輕以身許人惟恐老  
之將至功業未建於時無聞思見  
君子盡心以事之與共祿位也

其七

竭來荆山客誰爲珉玉分良寶絕見棄虛持三獻君直  
木忌先伐芬蘭哀自焚盈滿天所損沉溟道所羣東海  
有碧水西山多白雲魯連及夷齊可以躡青芬

士贊曰  
按此篇

已見二卷古風三十六首但有  
數語之異編詩者故兩存之

其八

嘉穀隱豐草草深苗且稀農夫既不異孤穗將安歸常

恐委疇隴忽與秋蓬飛烏得薦宗廟爲君生光輝

齊賢曰陶

潛詩種豆南山下草盛豆苗稀士贇曰此篇比興之詩  
刺時賢之不能引類拔萃以爲國用者歟嘉穀隱豐草  
草深苗且稀喻賢人在野混於常人之中常人類多而  
賢人類少農夫既不異孤穗將安歸蓋謂農夫知稼穡  
者以喻惟賢則知賢也農夫見穀之在草而不別異之  
猶賢者見賢之在野而不能薦進之也如此則將安適  
歸乎常恐委疇隴忽與秋蓬飛者喻在野之賢惟恐老  
之將至埋光鏹彩與草木俱腐也烏得薦宗廟爲君生

光輝者以喻在野之賢冀望在位之賢引而進之以羽儀朝廷也嗟夫士懷才而不遇千載讀之猶有感激

寓言三首

周公負斧戾成王何夔夔武王昔不豫剪爪投河湄賢聖遇讒慝不免人君疑天風拔大木禾黍咸傷萎管蔡

扇蒼蠅公賦鴟鵂詩金縢若不啓忠信誰明之

齊賢曰明堂位

曰周公朝諸侯于明堂之位天子負扆正南面而立武王既克商二年王有疾弗豫周公爲三壇北面植璧秉珪告于大王王季文王又武王既喪管叔及其羣弟流言於國曰公將不利於孺子周公乃告二公曰我之弗辟我無以告我先王周公居東二年則罪人斯得于後公乃爲詩以貽王名之曰鴟鵂王未敢誚公秋大熟未



穫天大雷電以風禾盡偃大木斯拔王啓金縢之書得  
周公代武王之說曰今天動威以彰周公之德惟朕小  
子其新造我國家禮亦宜之王出郊天乃雨反風禾則  
盡起士贊曰此詩懼讒也縶括金縢之事以申其意耳

其二

搖喬雙綵鳳婉孌三青禽往還瑤臺裏鳴舞玉山岑以

歡秦娥意復得王母心區區精衛鳥銜木空哀吟

齊賢曰秦

娥弄玉也張揖曰三足鳥三足青鳥也主爲王母取食  
士贊曰此篇比興之詩於時蓋有所諷刺焉彩鳳青禽  
以比倖幸之人瑤臺玉山以比宮掖秦娥以比公主王  
母以比后妃蓋以諷刺當時出入宮掖取媚后妃公主  
以求爵位者精衛銜木石以比小臣懷區區報  
國之心盡忠竭力而不見知者其意微而顯矣

其三

長安春色歸先入青門道綠楊不自持清風欲傾倒海

燕還秦宮雙飛入簾櫳相思不相見托夢遼城東

齊賢曰唐

京兆府長安縣卽長安也霸城門民間謂之青門士贊曰此篇閨思詩也良人從軍滔滔不歸感時觸物而動懷春之思者歟綠楊海燕以起興也宛然國風之體所謂聖於詩者此哉

秋夕旅懷

涼風度秋海吹我鄉思飛連山去無際流水何時歸目  
極浮雲色心斷明月暉芳草歇柔艷白露催寒衣夢長

銀漢落覺罷天星稀含悲想舊國泣下誰能揮

士贊曰此詩太

自作於竄逐之後乎身在遐荒心懷舊國詞意悲惋哀哉

### 感遇四首

吾愛王子晉得道伊洛濱金骨既不毀玉顏長自春可

憐浮丘公猗靡與情親舉首白日間分明謝時人二仙

去已遠夢想空慙慙

齊賢曰王子晉與浮丘公事見前士贊曰此詩蓋有所懷託二仙而

言也

### 其二

可嘆東籬菊莖疎葉且微雖言異蘭蕙亦自有芳菲未

泛盈樽酒徒沾清露輝當榮君不採飄落欲何依

士贊曰此

篇喻賢者蒙朝廷養育之恩有才而不見用空受此恩也當可用之時而若不採之惟有飄零老死而已將安所依乎是可嘆也

### 其三

昔余聞姮娥竊藥駐雲髮不自嬌玉顏方希鍊金骨飛

去身莫返含笑坐明月紫宮誇蛾眉隨手會凋歇

士贊曰此

篇遊仙體也末句諷以色事人色衰愛弛者

其四

宋玉事楚王立身本高潔巫山賦綵雲郢路歌白雪舉

國莫能和巴人皆卷舌一感登徒言恩情遂中絕

齊賢曰此

篇隲括宋玉答楚王問及高唐登徒子好色賦事見前  
士贇曰此篇太白特借宋玉事以申已之意耳如後篇  
詠壁上鸚鵡亦此意也

寫懷

翰林讀書言懷呈集賢諸學士

晨趨紫禁中夕待金門詔觀書散遺帙探古窮至妙片

言苟會心掩卷忽而笑青蠅易相點白雪難同調本是  
疎散人屢貽褊促誚雲天屬清朗林壑憶遊眺或時清  
風來閒倚欄下嘯巖光桐廬溪謝客臨海嶠功成謝人

間從此一投釣

士贇曰帙書衣也毛詩箋青蠅能汙白使黑莊子陽春白雪其調高其和寡嚴

光謝客事見前卷此太白寫心之作觀此則前效古一首槩可見矣

尋陽紫極宮感秋作

何處聞秋聲  
條條北窓竹  
迴薄萬古心  
攬之不盈掬  
靜坐觀衆妙  
浩然媚幽獨  
白雲南山來  
就我簷下宿  
嬾從

唐生決羞訪季主卜四十九年非一往不可復野情轉

蕭散世道有翻覆陶令歸去來田家酒應熟

齊賢曰唐生決疑事

見前史記司馬季主楚人卜於長安東市宋忠賈誼俱出洗沐遊於卜肆謁司馬季主淮南子蘧伯玉年五十而知四十九年非士贊曰太白雅尚冲澹是亦書懷之什也

### 江上秋懷

餐霞卧舊壑散髮謝遠遊山蟬號枯桑始復知天秋朔  
鴈別海裔越燕辭江樓颯颯風卷沙茫茫霧縈洲黃雲  
結暮色白水揚寒流惻愴心自悲潺湲淚難收蘅蘭方

蕭瑟長嘆令人愁

齊賢曰爾雅注杜蘅似葵而香士贊曰漢書袁閎散髮絕世此太白傷已

之作也不惟傷已而復爲同類者傷之悲夫

秋夕書懷

一作秋日南遊書懷

北風吹海鴈南渡落寒聲感此瀟湘客淒其流浪情海

懷結滄洲

一作遠心飛蒼梧

霞

一作遐

想遊赤城始探蓬壺事

一作

術

旋覺天地輕澹然吟

一作思

高秋閒卧瞻太清蘿月掩

一作隱

空幕松霜結

一作雲散

前楹滅見息羣動獵微窮至精

桃花有源水可以保吾生

齊賢曰天台山圖曰赤城山天台之南蓬壺蓬萊方壺也



士贇曰太白當謫逐之時乃能以  
仙遊自解可謂善處患難者矣

### 避地司空原言懷

南風昔不競豪聖思經綸劉琨與祖逖起舞雞鳴晨雖  
有匡濟心終爲樂禍人我則異於是潛光皖水濱卜築

司空原北將天柱鄰雪霽萬里月雲開九江春

齊賢曰  
祖逖與

劉琨聞雞起舞事見前寰宇記皖  
水在懷寧縣西北潯縣有天柱山

俟乎泰階平然後託

微身傾家事金鼎年貌可長新所願得此道終然保清

真弄景奔日馭攀星戲河津一隨王喬去長年玉天賓

齊賢曰泰  
階事見前

上崔相百憂章

時在潯  
陽獄

共公赫怒天維中摧鯢鯨噴蕩揚濤起雷魚龍陷人成  
此禍胎火焚崐山玉石相礮仰希霖雨灑寶炎煨箭發

石開戈揮日迴鄒衍慟哭燕霜颯來

齊賢曰列子曰共  
工氏與顓頊爭為

帝怒而觸不周之山折天柱絕地維書火炎崑岡玉石  
俱焚淮南子曰鄒衍盡忠於燕惠王王信譖而繫之鄒  
衍仰天而哭正  
夏天焉之降霜微誠不感猶繫夏臺蒼鷹搏攫丹棘崔

鬼豪聖凋枯王風傷哀斯文未喪東岳豈頽穆逃楚難

鄒脫吳災見機苦遲二公所咍驥不驟進麟何來哉賢齊

曰史記桀召湯而囚之夏臺已而釋之郢都爲中尉嚴酷行法不避貴戚列侯宗室見都側目而視號曰蒼鷹豪聖周公也周公遭流言之變王道凋枯故幽以下諸詩哀傷之檀弓孔子歌曰泰山其頽乎漢書楚元王少時嘗與魯穆生白生申公俱受詩於浮丘伯後以穆生白生申公爲中大夫穆生不嗜酒元王每置酒嘗爲設醴及王戊卽位常設後忘設焉穆生退曰可以逝矣醴酒不設王之意怠不去楚人將鉗我於市稱疾卧申公白生強起之穆生曰易稱知幾其神乎君子見幾而作不俟終日遂謝病去申公白生獨留王戊稍淫暴二人諫不聽衣之赭衣使舂於市鄒陽齊人仕吳久之吳王陰有邪謀陽奏書諫王不納其言於是陽去之梁從孝王遊士贊曰說文星離一門草擲二孩萬憤結習憂從楚人謂相啁曰咍

中催金瑟玉壺盡爲愁媒舉酒太息泣血盈杯台星再  
朗天網重恢屈法申恩棄瑕取材治長非罪尼父無猜  
覆盆儻舉應照寒灰

齊賢曰天官書曰魁下六星兩兩相比者名曰三台老子天網恢恢

疎而不漏孔子曰公冶長雖在繯綬之中非其罪也

萬憤詞投魏郎中

海水渤潏人罹鯨鯢蓊胡沙而四塞始滔天於燕齊何  
六龍之浩蕩遷白日於秦西九土星分磬磬栖栖南冠  
君子呼天而啼戀高堂而掩泣淚血地而成泥時當春

而不草獨幽怨而沉迷

齊賢曰左傳注鯨鯢大魚名以喻不義之人吞食小國齊之北

曰渤海燕之東曰遼海左傳晉侯曰南冠而縶者誰有司對曰鄭人所獻楚囚也使稅之問其族曰伶人也遂

操南音公語范文子曰楚四君子也士贊曰時安祿山反范陽燕地故云蒼胡沙而四塞日君象時明皇方幸

蜀都故曰遷白日於西秦高堂喻朝廷也

兄九江兮第三峽悲羽化之難齊

穆陵關北愁愛子豫章天南隔老妻一門骨肉散百草

遇難不復相提攜樹榛拔桂囚鸞寵雞舜昔授禹伯成

耕犁德自此衰吾將安棲好我者恤我不好我者何忍

臨危而相擠子胥鴟夷彭越醢醢自古豪烈胡爲此繫

蒼蒼之天高乎視低如其聽卑脫我牢狴儻辨美玉君

收白珪

齊賢曰九江三峽見前唐志沂州沂水縣有穆陵關洪州豫章郡南昌縣本豫章縣莊子曰堯

治天下伯成子高立爲諸侯堯授舜舜授禹伯成子高辭爲諸侯而耕禹往見之疾趨隴下避之或問曰堯治天下吾子立爲諸侯堯授舜舜授禹而吾子辭爲諸侯而耕何也子高曰堯治天下不賞而民勸不罰而民畏今子賞罰而民且不仁德自此衰刑自此立後世之亂自此始矣夫子盍行耶耕而不顧子胥鴟夷事見前卷漢祖醢醢彭越以偏賜諸侯

荊州賊平臨洞庭言懷作

脩蛇橫洞庭吞象臨江島積骨成巴陵遺言聞楚老水

窮三苗國地窄三湘道歲晏天崢嶸時危人枯槁思歸

阻喪亂去國傷懷抱

齊賢曰唐岳州巴陵郡有象湖巴蛇吞象暴骨於此因以名湖寰宇

記羿殺巴蛇於洞庭其骨若陵故曰巴陵

郢路方丘墟章華亦傾倒風悲猿

嘯苦木落鴻飛早日隱西赤沙月明東城草關河望已

絕氛霧行當掃長叫天可聞吾將問蒼昊

齊賢曰赤沙湖在洞庭西

通為沙湖

### 覽鏡書懷

得道無古今失道還衰老自笑鏡中人白髮如霜草捫

心空嘆息問影何枯槁桃李竟何言終成南山皓

齊賢曰捫

摸也南山皓即商山四皓

田園言懷

賈誼三年謫班超萬里侯何如牽白犢飲水對清流

齊賢

曰賈誼為長沙王太傅事見前班超扶風平陵人行請相者相者指曰生燕頤虎頸飛而食肉此萬里侯相也後將本所從三千餘人平定西域五十餘國皆納質內屬明年下詔封超為定遠侯邑千戶

江南春懷

青春幾何時黃鳥鳴不歇天涯失鄉

一作歸

路江外老華



髮心飛秦塞雲影滯楚關月身世殊爛漫田園久蕪沒

歲晏何所從長歌謝金闕

齊賢曰黃鳥黃鸝也士贊曰此太白流離湘楚之詩乎食

息不忘君其志亦可哀矣

### 詠物

#### 聽蜀僧濬彈琴

蜀中

蜀僧抱綠綺西下峨眉峰爲我一揮手如聽萬壑松客

心洗流水餘響入霜鐘不覺碧山暮秋雲暗幾重

齊賢曰樂

書相如蔡琰之綠綺峨眉山見前卷列子伯牙鼓琴志在流水山海經豐山有九鐘是知霜鳴郭璞曰霜降則

鐘鳴故  
言知也

魯東門觀刈蒲

魯國寒事早初霜刈渚蒲揮鎌若轉月拂水生連珠此  
草最可珍何必貴龍鬚織作玉牀席欣承清夜娛罷衣  
能再拂不畏素塵燕

士贇曰龍鬚草名此詩借蒲起興  
以自比也其有望君再用之意乎

白之志亦  
可哀矣

詠鄰女東牕海石榴

魯女東牕下海榴世所希珊瑚映綠水未足比光輝清

香隨風發落日好鳥歸願爲東南枝低舉拂羅衣無由

共攀折引領望金扉

齊賢曰新羅多海紅并海石榴西域傳大秦國西南距海八百里到

珊瑚洲底有盤石珊瑚生其上海人乘船沉鐵網水底發其根取之士贇曰此君子在野思見君子盡心事之意之

### 南軒松

南軒有孤松柯葉自綿冪清風無閒時瀟洒終日夕陰

生古苔綠色染秋煙碧何當凌雲霄直上數千尺

齊賢曰冪

覆也

詠山樽二首

前一首作詠柳  
少府山瘿木樽

蟠木不雕飾且將斤斧疎樽成山岳勢材是棟梁餘外  
與金罍並中涵玉醴虛慙君垂拂拭遂忝玳筵居

其二

擁腫寒山木嵌空成酒樽愧無江海量偃蹇在君門

齊賢

曰莊子惠子曰吾有大樹人謂之  
樗其大木擁腫而不中繩墨規矩

初出金門尋王侍御不遇詠壁上鸚鵡

一作勅  
放歸山

留別陸侍御  
不遇詠鸚鵡

落羽辭金殿孤鳴咤綉衣能言終見棄還向隴西飛

賢齊

曰此太白自況也曲禮曰鸛鵒能言不離飛鳥

### 紫藤樹

紫藤掛雲木花蔓宜陽春密葉隱歌鳥香風留美人

賢齊

曰歌鳥見一卷

### 觀放白鷹二首

八月邊風高胡鷹白錦毛孤飛一片雪百里見秋毫

士贊

曰孟子曰明足以察秋毫之末

其二

寒冬十二月蒼鷹八九毛寄言燕雀莫相啁

臨握切

自有

雲霄萬里高

觀博平王志安少府山水粉圖

粉壁爲空天丹青狀江海游雲不知歸日見白鷗在博  
平真人王志安沉吟至此願掛冠松溪石磴帶秋色愁

客思歸坐曉寒

齊賢曰唐博州博平郡博平縣掛冠辭祿而去也

題雍丘崔明府丹竈

美人爲政本忘機服藥求仙事不違  
萊縣已泥丹竈畢瀛洲當伴赤松歸  
先師有訣神將助大聖無心火自飛  
九轉但能生羽翼雙鳬忽去定何依

齊賢曰王喬高萊令有神術及赤松

事見  
前卷

### 觀元丹丘坐巫山屏風

昔遊三峽見巫山見畫巫山宛相似疑是天邊十二峯  
飛入君家綵屏裏寒松蕭颯如有聲陽臺微茫如有情  
錦衾瑤席何寂寂楚王神女徒盈盈高咫尺如千里翠

屏丹崖燦如綺蒼蒼遠樹圍荆門歷歷行舟泛巴水  
石潺湲萬壑分煙光草色俱氤氲溪花笑日何年發江  
客聽猿幾歲聞使人對此心緬邈疑入嵩丘夢綵雲齊賢

曰巫山三峽及陽臺神女事並見前南史景陵王子良傳貴字文煥善畫能於扇上圖山水咫尺之內便登高萬里爲遙士贊曰緬邈長遠也

求崔山人百丈崖瀑布圖

百丈素崖裂四山丹壁開龍潭中噴射晝夜生風雷但  
見瀑泉落如瀑雲漢來聞君寫真圖島嶼備縈迴石黛



刷幽草曾清澤古苔幽絨儻相傳何必向天台

齊賢曰說文瀑

飛泉也瀑水會也又小水入大水本草曾清生蜀中山谷及越嶲陶隱居云與空青同

見野草中有曰白頭翁者

醉入田家去行歌荒野中如何青草裏亦有白頭翁折

取對明鏡宛將衰鬢同微芳似相誚留恨向東風

齊賢曰本

草白頭翁一名野犬一名胡王使者一名奈何草生高山谷及野田陶隱居云處處有近根處有白茸狀似人

白頭故以爲名

流夜郎題葵葉

慙君能衛足嘆我遠移根白日如分照還歸守故園

賢齊

曰左傳鮑莊子之智不如葵葵猶能衛其足

瑩禪師房觀山海圖

真僧閉精宇滅跡含達觀列嶂圖雲山攢峰入霄漢丹崖森在目清晝疑卷幔蓬壺來軒牕瀛海入几案烟濤爭噴薄島嶼相凌亂征帆飄空中瀑水灑天半崢嶸若可陟想像徒盈嘆杳與真心冥遂諧靜者翫如登赤城裏揭步滄洲畔卽事能娛人從茲得消散

白鷺鷥

白鷺下秋水孤飛如墜霜心閒且未去獨立沙洲傍

詠槿

園花笑荒年池草艷春色猶不如槿花嬋娟玉階側芬  
榮何天促零落在瞬息豈若瓊樹枝終歲長翕艷

士贊曰槿

花朝華暮落一名日及一名薜華取一瞬之義

詠桂

世人種桃李皆在金張門攀折爭捷徑及此春風暄一

朝天霜下榮耀難久存安知南山桂綠葉垂芳根清陰  
亦可託何惜樹君園

白胡桃

紅羅袖裏分明現白玉盤中看却無疑是老僧休念誦  
腕前推下水晶珠

巫山枕障

巫山枕障畫高丘白帝城邊樹色秋朝雲夜入無行處

巴水橫天更不流

齊賢曰全篇  
事並見前註

南奔書懷

遙夜何漫漫空歌白石爛甯戚未匡齊陳平終佐漢攬

搶掃河洛直割鴻溝半歷數方未遷雲雷屢多難

齊賢曰甯

戚歌見前卷陳平家貧好讀書有田三十畝獨與兄伯居伯常耕作縱平使遊學仕魏王咎爲太僕人或讒之平亡去因魏無知求見漢王漢王與語悅之拜爲都尉掃河洛謂祿山反據洛陽也史記項王與漢約中分天下割鴻溝以西爲漢鴻溝以東爲楚天人秉旄鉞虎竹光藩翰侍筆黃金

臺傳觴青玉案不因秋風起自有思歸嘆主將動讒疑

王師忽離叛自來白沙上

一作兵羅  
滄海上

鼓譟丹陽岸賓御

如浮雲從風各消散

齊賢曰天人指永王璘張翰因秋風起思蓴鱸事見前宣州當塗縣

貞觀八年省丹陽縣入焉縣有丹陽湖

舟中指可掬城上骸爭爨草草出

近關行行昧前算南奔劇星火北寇無涯畔顧乏七寶

鞭留連道傍翫太白夜食昴長虹日中貫秦趙興天兵


茫茫九州亂感遇明主恩頗高祖逖言遇江誓流水志

在清中原拔劍擊前柱悲歌難重論

齊賢曰左傳邲之戰楚乘晉軍倉猝

不知所爲鼓於軍中曰先濟者有賞中軍下軍爭舟舟中之指可掬也又楚人圍宋將去申叔時僕曰築室反耕者宋必聽命從之宋人懼使華元夜入楚師登子反之牀起之曰敝邑易子而食析骸而爨雖然城下之盟

有以國斃不能從也晉王敦鎮姑孰將舉兵內向明帝  
密知之乃乘巴鎮駿馬微行全湖陰察其營壘而出敦  
晝寢夢日環其城起曰此必黃鬚鮮卑奴來也使五騎  
物色追帝帝亦馳去馬有遺糞輒以水灌之見逆旅賣  
食姬以七寶鞭與之曰後有騎來可以此示也俄而追  
者至問姬姬曰去已遠矣因以鞭示之五騎傳翫稽留  
遂久又見馬糞冷以爲信遠而止不追蘇林曰秦白起  
伐趙破長平軍欲遂滅趙遣衛先生說昭王益兵糧爲  
應侯所害事用不成其精誠上達於天故太白馬之食  
昂昂趙分將有兵故太白食食者干歷之也荆軻白虹  
貫日漢臣拔劍擊柱及祖述志清中原事並見前卷士  
贊曰按此篇用事偏枯句意倒雜決非太白之作姑存  
而置諸卷末以俟心知其意者



李太白集分類補註卷二十四